



Московская Патриархия
УПРАВЛЕНИЕ ДЕЛАМИ

«13» 09 2021 г.

№ 01/4504

115191, Москва, Даниловский вал, 22
Тел.: (499) 578-03-55, факс: (499) 578-03-54
E-mail: udsekr@patriarchia.ru

**Его Высокопреосвященству,
Высокопреосвященнейшему ПАВЛУ,
митрополиту Крутицкому и Коломенскому,
Патриаршему наместнику Московской митрополии**

Копия: Высокопреосвященнейшему АКСИЮ,
архиепископу Подольскому и Люберецкому

Ваше Высокопреосвященство, дорогой Владыка!

В соответствии с порядком утверждения богослужебных текстов местночтимым святым (журнал заседания Священного Синода № 113 от 29.12.2020 г.) направляю Вам одобренную редакцию текста службы преподобному Владимиру Белопесоцкому для использования в Подольской епархии и печати в епархиальных изданиях.

Обращаю Ваше внимание, что в случае общецерковного прославления преподобного Владимира Белопесоцкого, необходимо подать рапорт в Синодальную богослужебную комиссию для утверждения Священным Синодом общецерковного употребления текста службы.

С любовью о Господе,

**управляющий делами Московской Патриархии,
митрополит Воскресенский**

Месяца июля в 15-й день

Преподобного Владимира, игумена Белопесоцкого

На вечерни

На Господи, возвах: стихиры, глас 8.

Подобен: Мученицы Господни:

Преподобен и честен светильник Божественный и светоносный/ под спудом никогдаже скрывается,/ но на свещнице поставляется,/ да светит миру всему./ Темже, Христе Боже,/ молитвами преподобного Владимира/ ум наш просвети/ и спаси души наша.

Духом Святым управлен,/ в лодии телесней житейскую пучину легко прешел еси,/ богомудре Владимире,/ и, похоти мирския отверг,/ во обитель Хутынскую водворился еси,/ идеже трудолюбне подвизався,/ любовь Христову стяжал еси/ и Богу угодил еси./ Егоже моли спасти души наша.

Небеснаго Отечества взыскупя,/ имения и род оставил еси,/ Владимире блаженне,/ и, из Новгородских пределов исшед,/ в Песках Белых обитель Святыя Троицы устроил еси,/ Ейже ныне в непреступней славе предстоя,/ моли спастися душам нашим.

Руце твои на рало возложил еси, всечестне Владимире,/ делая всегда Божественная,/ и вспять не обратился еси,/ но благопоспешно шествовал еси/ и, ниву души твоя трудолюбне возделав,/ плод сторичный Богу принесл еси./ Егоже моли спасти души наша.

Слава, глас 6:

Еже по образу соблюд невредимо,/ ум владыку на страсти пагубныя постнически поставил еси,/ мужески бо естество понудив,/ потщался еси худшее покорити лучшему/ и плоть поработити духу./ Темже, отче наш Владимире,/ монашествующих явился еси наставник/ и правило добродетели известнейшее./ Ныне чисте зриши на Небесех Святую Троицу,/ моляся непрестанно/ о иже верою и любовию чтущих тя.

И ныне, Богородичен: Кто Тебе не ублажит:

Вход. Прокимен дне. И чтения три преподобническая.

На литии стихира храма.

На стиховне стихиры, глас 1.

Подобен: Небесных чинов:

Наста, богоносе Владимире,/ солнца светлейший твой праздник,/ озаряя
приходящая к тебе с верою/ и бессмертием облагоухая,/ душам же источая
исцеления./ Темже, отче преподобне,/ моли Христа Бога о душах наших.

Стих: Честна пред Господем/ смерть преподобных Его.

Чувственные страсти телесныя/ низложив воздержанием/ и, яко
безплотен, на земли пожив,/ вся плотская желания духу покорил еси./ Тем
ныне, святе Владимире,/ в Небесных селениях водворяясь,/ моли Христа Бога
о душах наших.

Стих: Блажен муж, бояйся Господа,/ в заповедех Его восхощет зело.

Блаженне отче Владимире,/ ты, ветхаго человека совлекся,/ во Христа
облеклся еси воистинну/ и, основание добродетели положив,/ вражия
ополчения одолел еси./ Темже искусный наставник монахов явился еси./
моли спастися душам нашим.

Слава, глас 8:

Монахов множества/ наставника тя почитаем, отче наш Владимире./
твоею бо стезею воистинну право ходити познахом./ Блажен еси, Христу
работав,/ и вражию обличил еси силу,/ ангелов собеседниче, преподобных
сопричастниче и праведных,/ с нимиже молися Господеви/ помиловатися
душам нашим.

И ныне, Богородичен: Безвестная Дево:

Тропарь, глас 5:

Вышним благословением укрепляемь,/ в пустыню вселился еси./
богомудре отче Владимире,/ идеже, ангельски пожив,/ плотское мудрование
отринул еси./ Темже, видево Господь подвиги твоя,/ вождя дружины духовныя

постави тя/ и земли Московския защиту и ограждение./ Ныне, предстоя престолу Пресвятыя Троицы,/ моли спастися душам нашим.

На утрени

По 1-м стихословии седален, глас 4.

Подобен: Скоро предвари:

Званию Господа последовал еси, мир отвергнув и вся, яже в мире красная, всеблаженне Владимире, и, пустынное озлобление претерпев, демонов полки мужественне отразил еси. Темже твою память песньми присно восхваляем.

Слава, и ныне, Богородичен:

Обновила еси, Чистая, Божественным Рождеством Твоим истлевшее страстьми земнородных мертвенное существо и воздвигла еси вся от смерти к жизни нетления. Темже Тя по долгу блажим вси, Дево Препрославленная, якоже прорекла еси.

По 2-м стихословии седален, глас 5.

Подобен: Собезначальное Слово:

Постника Господня песньми почтим, яко умертвивша воздержанием вся прилоги страстей и твердым терпением посрамивша зело противоборца врага и всю гордыню его, ныне же молящаяся Господеви помиловатися душам нашим.

Слава, и ныне, Богородичен:

Дивно чудо зачатия и образ рождества несказанен в Тебе познася, Приснодево Чистая, ужасает мой ум и удивляет помышление, слава бо Твоя, Богородице, во всех простресея ко спасению душ наших.

Величание:

Ублажаем тя,/ преподобне отче Владимире,/ и чтим святую память твою,/ наставниче монахов/ и собеседниче ангелов.

Псалом избранный: Терпя потерпех Господа:

По полиелеи седален, глас 1.

Подобен: Гроб Твой, Спасе:

Погребл еси страстей возстание умерщвлением плоти, священный отче, и жизнь безконечную от Бога приял еси. Темже днесь Христова Церковь празднует твою досточудную память, Владимире, преподобных украшение.

Слава, и ныне, Богородичен:

Настави ны на путь покаяния, уклоняющихся присно к злым безпутием и прогневающих преблагаго Господа, Неискусобрачная Благословенная Марие, прибежище отчаянных человеков, Божие обиталище.

Степенна, 1-й антифон 4-го гласа. Прокимен: Честна пред Господем смерть преподобных Его. Стих: Что воздам Господеви о всех, яже воздаде ми? Всякое дыхание: Евангелие от Матфея, зачало 43.

По 50-м псалме стихира, глас 6:

Приидите, людие,/ хвалу принесем отцу нашему,/ преподобному Владимиру,/ вопиюще сице:/ радуйся, пресветлый столпе,/ просвещай нас подвиги своими;/ радуйся, отче всеблаженне,/ любви Божией нас научай;/ радуйся, добрый пастырю,/ путеводяй нас к Царствию Небесному.

Канон, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.

Благими нравы украсився, от юности Христу прилепился еси и, плотския страсти умертвив воздержанием, к жизни нестареемей, преподобне Владимире, преставился еси.

Заповедей Божиих усердный делатель быв, отче премудре Владимире, Божественных даров исполнился еси и всем потоки благодати богато излилял еси.

Ум просвещен имел еси и око сердечное, непрестанно взирающее к Богу, темже и Духа Святаго исполнился еси, премудре Владимире, и с лики преподобных сочетался еси.

Богородичен: Неподобная двизания ума моего и пламень страстей плотских угаси, молю Тя, Пречистая Дево, и спаси мя заблуждающего человека.

Песнь 3

Ирмос: Ты еси утверждение/ притекающих к Тебе, Господи,/ Ты еси Свет омраченных,/ и поет Тя дух мой.

Всего себе в руце Вседержителя предав, отче Владимире премудре, бесовскую злобу одолел еси.

Мирскую суету отринув, смирением избегл еси сетей вражиих и крилами добродетелей к Небесам воспарил еси.

Имея поспешествующую тебе Божию силу, многия иноки во обитель Белопесоцкую собрал еси и тех добре в Царствие Небесное управил еси.

Богородичен: В ложесна Твоя, Всенепорочная, вселися Зиждитель воплощаемь, на благодееяние верно поющим Тя.

Седален, глас 4.

Подобен: Скоро предвари:

Плотское мудрование отвергл еси и, хуждшая поработив лучшему, отче Владимире преславне, ум владыку на страсти поставил еси и, сокрушив бесовския козни постом, возсиял еси добродетельми. Сего ради верою и любовию тя восхваляем.

Слава, и ныне, Богородичен:

Стена непобедимая христианом еси, Богородице Дево, к Тебе бо прибегающе, невредами пребываем и, паки согрешающе, имамы Тя Молитвенницу. Тем, благодаряще, вопием Ти: радуйся, Благодатная, Господь с Тобою.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Душу твою храм Святаго Духа содеяв, преподобне, наследник горняго Царствия со всеми святыми явился еси.

Многоблезненные страсти всегда врачуеши притекающих к тебе, святе, благодать бо приял еси от Господа содевати преславная.

Краснейшим прозябением, отче, в дому Божии процвел еси, добродетельми украшен и плоды чудесными благоухаемь.

Богородичен: Ниво духовная, Дево Богородице, Клас присноживотный прозябла еси, Бога истинного, всю тварь питающего.

Песнь 5

Ирмос: Утренююще вопием Ти,/ Господи, спаси ны,/ Ты бо еси Бог наш,/ разве Тебе иного не вемы.

Ум очистив, блаженне Владимире, ныне зриши доброту неизреченную Христа и славу Бога нашего.

Якоже Илия колесничник, отче, добродетельми твоими возшел еси на небо, Духом возвышаемь.

Воздержанием и постом плоть укротив, отче преподобне, широты безстрастия достигл еси.

Богородичен: Исцели омрачение недугующаго ума моего, Врача рождающая Христа, Всенепорочная Владычице.

Песнь 6

Ирмос: Молитву пролию ко Господу,/ и Тому возведу печали моя,/ яко зол душа моя исполнися,/ и живот мой аду приближися,/ и молюся яко Иона:/ от тли, Боже, возведи мя.

Священными твоими молитвами лукавый отгоняется змий и козни того разрушаются, войне добропобедне Владимире. Ты бо еси угодник Божий всесветел и заступник о нас верен.

Молитвенным серпом страстей терния изсек и ралом воздержания землю душевную возделав, отче Владимире, ввергл еси в ню семена благочестия и возвращаеши нам исцеления плоды.

Крепости Духа исполнися, отче Владимире, коварство вражие посрамил еси и, яко раб Христов благий и верный, венец победный от Того приял еси.

Богородичен: Ходатайство Твое, Пречистая Отроковице, пред Сыном Твоим наветов вражиих нас избавляет и надежду благ вечных озаряет. Темже Тя ныне с любовию ублажаем.

Кондак, глас 2:

Мирския суеты отрешився,/ в постнических подвизах добре потрудился еси/ и, яко крин, в пустыни процвел еси,/ идеже обитель Живоначальных Троицы воздвигл еси,/ отче преподобне Владимире,/ земли Московския похвало и украшение.

Икос:

Ангел земный и человек небесный воистину был еси, преподобне отче наш Владимире, издетска бо страху Божию родители твоими наученный, в преподобии и правде во вся дни живота твоего неленостно Господеву поработал еси. Мы же, удивляющесе равноангельному житию твоему, прославляем тя сице:

Радуйся, земли Тверския прозябение святое;

радуйся, града Ржева отрасль пречестная.

Радуйся, славных родителей плод боголюбезный;

радуйся, лучами Трисолнечнаго света озаренный.

Радуйся, любовь к добродетели от младенчества явивый;

радуйся, на служение Христово сердце твое устремивый.

Радуйся, писаньми божественными душу твою напитавый;

радуйся, вся благая мира сего ни во что же вменивый.

Радуйся, преподобне Владимире, земли Московския похвало и украшение.

Песнь 7

Ирмос: От Иудеи дошедше отроцы,/ в Вавилоне иногда,/ верою Троическою пламень пещный попраша, поюще:/ отцев Боже, благословен еси.

Прошед подвиги постныя, отче, смирением твоим гордыню диавольскую победил еси, вопия: отцев Боже, благословен еси.

Проповедует обитель Белопесоцкая труды и подвиги твоя, преподобне. Воистинну, древним отцем подражая, пустыни прозябение многоплодное явился еси, подвизая верных воспевати: отцев Боже, благословен еси.

Ум просветив и сердце очистив, начальник священнаго собора иноков был еси, отче, наказуя же терпению и изъясняя волю Божию, научал еси всех воспевати: отцев Боже, благословен еси.

Богородичен: Пребезначальное Слово рождши, обетшавши ны грехом обновила еси, Дево, и пети укрепила еси: отцев Боже, благословен еси.

Песнь 8

Ирмос: Богоглаголивии отроцы в пеци,/ со огнем пламень попирающе пояху:/ благословите дела Господня Господа.

Ангельски, отче, пожив, наследник божественных селений явился еси, идеже ныне воспеваеши: благословите вся дела Господня Господа.

Невозвратно шествовав стезями Божественными, отче премудре, пути грешных всеконечне уклонился еси, воспевая: благословите вся дела Господня Господа.

Лествицею добродетелей на высоту Боговедения возшел еси, отче досточудне, взывая: благословите вся дела Господня Господа.

Богородичен: Источник еси неистощимый, Дево, от негоже вси пиюще, благодати Христовой исполняемся, благословяще Господа во веки.

Песнь 9

Ирмос: Устрашися всяк слух/ неизреченна Божия снизхождения,/ яко Вышний волею сниде даже и до плоти,/ от девического чрева быв человек:/ темже Пречистую Богородицу, вернии, величаем.

Дух Божий от страстей греховных исцеляет приходящих к тебе с верою и лукавство вражие далече прогоняет, воздвизая восхваляти подвиги твоя, отче блаженне.

Величием подвиг твоих возсияв, преподобне, отечество наше озарил еси и по успении твоём от земных к свету Невечернему прешел еси. Темже вопием ти: просвети нас, в память твою сошедшихся, отче богомудре.

Яко шипок благовонный процвел еси в постнических удолиях, прехвальне отче наш, верных добродетельми и чудесы облагоухая. Темже страсти наша злосмрадныя уврачуи и на путь покаяния настави.

Богородичен: Просвети, Чистая Дево, сердце мое, омраченное грехми и мною суетою житейскою, не остави же мене врагом быти в радость, яко да славлю имя Твое, Всепетая.

Светилен.

Подобен: Жены услышите:

Процвел еси, яко финикс давидски, отче, и обитель явился еси Духа Пресвятаго, Иже славна тя вселенней показа. О нас непрестанно моли, почитающих верою пречестную память твою, преподобне Владимире.

Слава, и ныне, Богородичен:

Тя песньми немолчными ублажаем, Дево, яко от Троицы Единого родила еси непреложно и неизменно, Богородице, и носиши на Божественную руку пребогатое Слово.

На хвалитех стихиры, глас 6:

Богоносе отче Владимире,/ все плотское мудрование духу повинул еси/
и, яко злато очищено сияя,/ приятелище Духа Пресвятаго явился еси;/ собрав
же монашествующих множества,/ учении твоими на высоту добродетелей
возвел еси./ Поминай и нас, чтущих священную память твою,/ моля Христа
Бога спастися душам нашим. [Дважды.]

Преславне отче Владимире,/ возсия днесь светлая память твоя,
созывающи христоименитых людей множества/ к похвалению в Трех Лицах
певаемого Бога нашего./ Темже, притекающе во святую обитель твою,
благодать Духа Святаго обильно приемлем/ и тебе венчавшаго Христа
прославляем,/ Спаса душ наших.

Блаженне отче Владимире,/ ты давидски слезами землю оросил еси/ и
не дал еси сна очима твоима,/ ни веждома твоима дремания,/ являя сердечное
желание ко Христу,/ Егоже возлюбил еси./ Образ же быв целомудренного

жития,/ нас, в добродетели убогих,/ на стези покаяния настави,/ ревновати о благочестии научи/ и моли спастися душам нашим.

Слава, глас 2:

Преподобне отче Владимире,/ ты измлада добродетели прилежно обучився,/ жилище Святаго Духа был еси/ и, благодать приим изобильно,/ единое на потребу искати увещавал еси ученики твоя./ Ныне же Престолу Пресвятей Троицы предстоя/ и Божественным светом чистейше осияваемь,/ моли Христа Бога спастися душам нашим.

И ныне, Богородичен:

Все упование мое на Тя возлагаю,/ Мати Божия,/ сохрани мя под кровом Твоим.

На Литургии служба вся преподобническая.

Молитва

О, преславный угодниче Христов, преподобне отче Владимире, премудрый наш наставниче, обители Белопесоцкия начальниче и земли Московския покровителю!

Яко имеяй дерзновение ко Владыце Христу и Пречистой Его Матери, буди молитвенник теплый о нас, недостойных, подвизающихся во святей обители твоей, и всех, с верою притекающих на место сие, идеже многолетне телом почиваеши.

Испроси, богомудре, пастырем ревность и попечение о пасомых, монашествующим споспешествуй в чистом житии, утешая их в скорбех и печалех и милостивно подкрепляя в болезнях. Заступи от всех бед и напастей верная чада твоя, сохраняя от враг видимых и невидимых. Наипаче помолися достопоклоняемей Троице, Ейже ты, святче Божий, усердно во временней жизни послужил еси, утвердился Православию в земли Русстей и отечеству нашему пребыти в мире и благоденствии. Нас же всех, почитающих святую память твою, настави в земнем странствии на путь спасения и управи к Царствию Небесному, да тамо вкупе с тобою и всеми святыми прославим Отца и Сына и Святаго Духа ныне и присно и во веки веков. Аминь.